

911.

1445 Juli 24

Conrad von Brandenstein verkauft einen Schacht bei der Reichen Zeche.

fol. 169r Actum sabbato ante Jacobi anno domini etc. Xlquinto hat der erbere und veste Cunrad von Brandinsteyn bekanth, daz er Franczen Kodirleyn czu Swarczinberg gesessin vorkauft hab eyn schicht an der reichin czech uff dem Uwirsberge mit eynir schicht an der mule dorczu gehorinde, dy om Francz Kodirleyn mit 16 ß gr czur gnuge bezalt hat. Gereth und globit, daz er den gnanten Franczen sulchir schigkt uff dem genanten berge und mulen vor ansprach keyn eyn ydirman gewerin wolle. Davor hat er om vor eyne were und phant eyngesaczt seyn behuszunge hy czu Czwigkaw uff Unserir Libin Frawenpharrekirchin, ab er von ymandis umbe sulch vorkauft bergwergk angelangit wurde, daz er sich sulches geldis an dem genanten husze vor idirmenlichen mag irholin. Geschen bey dem burger(meiste)r Oswald Kaufman und synen kumpan.

912.

1445 Juli 25

Heinz Pezawir quittiert für erhaltenes Geld.

fol. 169v Actum in die sancti Jacobi anno domini etc. Xlquinto ist komen Heyncze Peczawir des von Swanbergis man und hat bekanth, daz om Jorge von Wolffdorff^{a)} bezalt hat als huthe 15 gulden an golde, dy sich noch dem und es czwischen beiden partyen beteidigint wordin ist. Der geschr(iebenen) summe goldis hat^{b)} er on und seyn brudir quid, ledig und loz gesagit, apud proconsulem Oswaldum Kaufman.

a) folgt durchgestrichen an b) folgt durchgestrichen sy

913.

1445 --

Kunz Krossener bezahlt für einen Acker.

fol. 169v Actum apud proconsulem Oswaldum Kaufman et suorum consedentium anno domini etc. Xlquinto hat Kuncz Krossener dem rathe bezalt und gegeben 14 ß minus 20 gr nuwis geldis, darvor om eyn agkir, der Hanszen von Stechaw gewest ist, keyn der Plawnicz^{a)} gelegen, den om dy rethe vorkaufft haben. Des agkirs wir und alle nach komenden rethe on vor ansprach gewern wollen, gereden on do bey czu behalden und^{b)} czu vorteidingen an arge list.

a) folgt durchgestrichen gegeben b) folgt durchgestrichen do bey